

Bosna i Hercegovina  
Federacija BiH  
Kanton Sarajevo  
Skupština Kantona Sarajevo  
11. radna sjednica

## ZASTUPNIČKO PITANJE

n/p predsjedavajućeg, gosp. Elmedin Konaković  
Vlada Kantona Sarajevo

S obzirom da već mjesecima kao kosturi iz ormara iskaču kontroverze oko organizacije EYOF-a, prije nekoliko dana smo iz pisma predsjednika OK, gosp. Kisića izgleda uspjeli dotaknuti zenit potencijalnog sramoćenja i bacanja ljage na najveći sportski projekat od rata na ovamo, činjenicom da nisu vraćene kotizacije učesnicima.

Detaljno sam pročitala odgovore na pitanje kolegice Nejre Dizdarević kada je u pitanju finansijski izvještaj EYOF-a, i vidim kako i dalje nismo u mogućnosti da osiguramo cjelokupan izvještaj o ukupnim utrošenim sredstvima za organizaciju navedenog događaja, niti onih koja smo mi dodjelili kroz Ministarstvo privrede, što moram priznati, kontaminira kompletnu priču oko finansijske transparentnosti realizacije projekta.

Podsjećam kako su se već i ranije vezali skandali uz troškove EYOF-a. Ostalo je nejasno kako su za smještaj učesnika iskazani troškovi od 2,5 miliona KM, a čak su se i pojedini ambasadori raspitivali kako je moguće da je takmičarima naplaćivano po 180 eura po danu za smještaj.

Imamo informacije u medijima kako je revizija EYOF-a za 2018. pozitivna, a da zbog nedostatka kvoruma Skupština nije još sazvana i ne zna se kakvo je stanje za 2019. godinu, što je moram reći, više nego problematično.

Kanton Sarajevo je izdvojio najveći iznos novca za EYOF, oko pet miliona KM, dok je, prema nekim izvještajima, sve koštalo oko tri miliona, da bi na kraju koštanje kompletne organizacije sumirano na čak 12 miliona maraka. Previše je špekulacija oko utrošenih miliona, da je već sve prevazišlo granice dobrog ukusa uzimajući u obzir da je sve ovo ipak plaćeno novcem građana KS.

**Kako smo mi kao KS jedan od dominantnih sponzora navedene manifestacije, a da već predugo traju kontraverze oko smještaja, pa finansiranja medijskog praćenja istog, do kotizacija, tražim i smatram nužnim da Vlada KS osigura kompletan izvještaj finansiranja EYOF koji će biti objavljen javno na stranicama vlade, sa posebnim osvrtom na ono što je uplaćeno iz KS, te na šta je konkretno potrošeno!**

**Dužni smo i zbog potencijalne međunarodne sramote, a i zbog građana konačno ovaj proces usmjeriti u raščišćavanje svih detalja, jer se bojim kako ovo sve izgleda da će okončanje EYOF-a završiti stečajem firme koja ga je organizovala!**

Sarajevo, 15.07.2019.

Segmedina Srna Bajramović  
zastupnica SDP BiH u SKS